



Trattativas da la suprastanza cumünala Zernez

Protocol no. 004/2016 dals 21-04-2016

Taxas 2015 - protestas cunter la taxaziun

La fin da november 2015 sun gnüts tramiss ils raduond 1500 quints da las taxas cumünalas pel 2015. In seguit sun entradas raduond 170 protestas (ca. 1% dals quints) cunter la prüma taxaziun sün basa da las ledschas novas chi sun idas in vigur davo la fusiun dals cumüns. Las bleras da quellas protestas s'ha pudü evader cun üna taxaziun nouva causa mutaziuns o adattamaints d'objects chi nu d'eiran o nu pudaivan esser cuntschaints. Ulteriurs cas s'ha pudü schoglier davo ün discuors tanter ils protestaders ed ils respunsabels da la direcziun operativa. Finalmaing sun restadas 14 protestas sur da las qualas la suprastanza cumünala ha trattà e relaschè ün decret a man dals protestaders. L'import total da las taxas chi vegnan inchaschadas pel 2015 importa raduond 1.14 milliuns francs ed es bundant 1% plü bass co la calculaziun chi's vaiva fat per elavurar la basa legala nouva.

Proget da sanaziun dal s-chodamaint central - decisiun da realisaziun

Il proget da sanaziun e rimplazzamaint dal s-chodamaint central da ziplas a Zernez es pront per gnir preschantà a la populaziun. Sco prossem vegnan infuormats ils abunents actuals sur dal proget. Als 30 mai ha lö ün tavulin da proget per tuot la populaziun interessada. A la radunanza cumünala dals 27 gün 2016 vain lura preschantà il proget culla dumonda da credit per la realisaziun dal rimplazzamaint dal s-chodamaint central da ziplas.

Sanaziun Punt Güstizia - surdatta da lavurs d'impressaris

La suprastanza cumünala ha surdat las lavurs per la sanaziun da la Punt Güstizia: lavurs in lain a Foffa Conrad Holzbau, Zernez; lavurs in metal a Rauch Metallbau AG, Zernez. La punt nouva in Güstizia dess gnir drivida il plü tard la fin da gün 2016.

Sanaziun via Alp Pülschezza - surdatta da lavur d'impressari

Per la sanaziun da la via da l'Alp Pülschezza es gnüda surdatta la lavur a l'impraisa Foffa Conrad SA, Zernez. La via vain sanada d'ürant la prümvavaira/stà 2016.

Spalüdamaint i'ls contuorns da Gonda-Curtins - surdatta da lavur d'impressari

Cun la realisaziun da la meglioraziun a Lavin intuorn l'on 1960 sun gnüdas fabbrichadas diversas lingias da spalüdamaint i'ls contuorns da Gondas-Curtins. Quistas lingias han per gronda part ün diameter massa pitschen e sun cun quai stoppadas. Las lingias vegnan uossa rimplazzadas cun büschens cun ün diameter plü grond. La lavur d'impressari per la prüm'etappa, chi vain realisada d'ürant la prümvavaira 2016, es gnüda surdatta a l'impraisa Foffa Conrad SA, Zernez.

Proget "structuras optimalas da la gestiun tecnica"

La suprastanza cumünala ha acceptà il plan da gestiun per l'uffizi tecnic dal Cumün da Zernez. Quist plan da gestiun d'eira gnü elavurà i'l rom dal proget "structuras optimalas da la gestiun tecnica".

Rinch da maschinas intercumünal - deliberaziun dal credit d'investiziun

La suprastanza ha deliberà il credit chi vala sco partecipaziun dal Cumün da Zernez vi dal rinch da maschinas intercumünal (RMI). Il credit es part dal preventiv d'investiziuns 2016. Uschè po il rinch da maschinas cumanzar cun la gestiun.

Proget "lavur mobila da giuventüna" i'l program dal Interreg

Sün basa da differents stüdis e differentas lavurs da matura esa muossà sü chi dovress eir in nossa regiun ün sustegn per giuvenils in fuorma mobila. L'idea es da tour sü quist proget aint il program dal Interreg. Quai vess l'avantag cha l'uniun Europea (EU) e la Confederaziun surpigliessan bainquant dals cuosts e las regiuns gnissan uschè schaniadas finanziarmaing e pudessan listess manar tras il proget. La suprastanza ha decis da sustgnair l'integraziun dal proget "lavur mobila da giuventüna" i'l program dal Interreg. Eir il cussagl da scoula sustegna quist proget. Il program dal Interreg ha amo da gnir trattà e sancziunà a la radunanza dals presidents da la regiun.

Contrat d'adöver d'infrastructura da la OELL SA per la OEF

L'Ouvra Electrica Funtanivas (OEF) fa adöver da diversa infrastructura da l'Ouvra Electrica Lavinuoz Lavin (OELL). Perquai ha la OELL SA preparà ün contrat per reglar l'adöver da quist'infrastructura. I's tratta da l'adöver dal provedimaint electric, dal provedimaint da lingias da fibra da vaidar, da parts dal sistem da manaschi sur internet e dal provedimaint d'aua dal reservuar cumünal. Il contrat es gnü approvà.